

24/11/2001

Pemimpin dunia ucap takziah

KUALA LUMPUR, Jumaat - Raja Arab Saudi, Raja Fahd Abdul Aziz adalah antara beberapa pemimpin dunia yang mengutus ucapan takziah di atas kemangkatan Yang di-Pertuan Agong ke-11 Almarhum Sultan Salahuddin Abdul Aziz Shah.

Pemimpin lain termasuk Presiden Iran Mohammed Khatami, Presiden Emiriah Arab Bersatu (UAE) Sheikh Zayed bin Sultan Al Nahyan dan Presiden Perancis, Jacques Chirac.

Semua perutusan itu dihantar kepada Timbalan Yang di-Pertuan Agong Sultan Mizan Zainal Abidin dan Perdana Menteri Datuk Seri Dr Mahathir Mohamad.

Dalam perutusannya kepada Perdana Menteri, Presiden Mohammed Khatami mendoakan semoga roh Almarhum diberkati Allah.

Presiden Chirac pula berkata, beliau dan rakyat Perancis turut bersedih atas kemangkatan Seri Paduka dan mengucapkan takziah kepada rakyat Malaysia.

Naib Presiden UAE dan Pemerintah Dubai, Sheikh Maktoum Rashid Al Maktoum serta Pemerintah Sharjah, Dr Sheikh Sultan Mohammed Al Qasimi turut mengutus ucapan takziah kepada Sultan Mizan dan Dr Mahathir.

Putera Mahkota Arab Saudi, Putera Abdullah Abdul Aziz dan Menteri Pertahanan Putera Sultan Abdul Aziz juga menghantar perutusan serupa.

Pemangku Perdana Menteri New Zealand, Jim Anderton dalam satu kenyataan berkata kemangkatan Seri Paduka adalah sesuatu yang menyedihkan bagi Malaysia dan New Zealand.

(END)